

四庫全書

集部

沒些把鼻莫輕容古人瞞過常談俗事裝點幾張故紙
無奈藏頭露尾不睬他上計中計下計濁酒三杯清琴
一几別饒借澹月微風受用殘山剩水五更事休辦取

御選歷代詩餘卷九十九

欽定四庫全書

御選歷代詩餘卷一百目錄

起一百五十五字至二百四十字

寶鼎現

趙長卿

康與之

前調

又一體

無名氏

前調

又一體

張元幹

前調又一體

劉辰翁

怨朱絃

王世貞

三臺又一體

万俟雅言

拋毬樂又一體

柳永

哨徧

汪莘

前調又一體

辛棄疾

前調又一體

蘇軾

前調又一體

蘇軾

前調

又一體

王安中

辛棄疾

二首

劉克莊

吳潛

方岳

二首

曹冠

戚氏

柳永

前調又一體

蘇軾

鶯啼序

黃在軒

前調又一體

楊慎

前調 又一體

汪元量

前調 又一體

吳文英

前調 又一體

吳文英

前調 又一體

吳文英

前調又一體

趙文

御選歷代詩餘一百目錄

欽定四庫全書

御選歷代詩餘卷一百

起一百五十五字
至二百四十字

司經局洗馬掌書事兼翰林院修撰加二級臣王奕清奉

日校刊

寶鼎現

三疊一百五十五字東觀漢記載永平六年寶鼎
出雒山班固東都賦云寶鼎見兮色紛縕調名取
此

寶鼎現

上元

趙長卿

金匱要略卷一百一
驚塵盡埽碧落輝騰元宵三五更漏永遲遲停鼓天上
人間當此遇正年少盡香車寶馬次第追隨士女看往
來巷陌連薨簇起星球無數政簡物阜清閒處聽笙
歌鼎沸頻舉燈燄暖庭帷高下紅影相交知幾戶恣歡
笑道今宵景色勝却前時幾度細算來皇都此夕消得
喧傳今古綺席成行爐噴裊沉檀輕縷覩遨遊綵仗
疑是神仙伴侶欲飛去恨難留住漸到蓬瀛步願永逢
恁時恁節且與風光為主

前調

康與之

夕陽西下暮靄紅溢香風羅綺乘麗景華燈爭放濃燄
燒空連錦砌覩皓月浸嚴城如畫花影寒籠絳蕊漸掩
映芙蓉萬頃迤邐齊開秋水太守無限行歌意擁麾
幢光動珠翠傾萬井歌臺舞榭瞻望朱輪駢鼓吹控寶
馬耀貔貅千騎銀燭交光數里似亂簇寒星萬點擁入
蓬壺影裏宴閣多才環艷粉瑤簪珠履恐省省丹詔
催奉宸遊燕侍便趁早占通宵醉緩引笙歌妓任畫角

吹老寒梅月滿西樓十二

前調 又一體

無名氏

東君著意化工恩被灼灼妖艷裊嫩梢輕蓓繁風惹露
偏早香英綻似向人故矜誇標致倚闌全如顧盼尚困
怯餘寒柔情弱態天真無限 斷橋壓柳時非淺先百
花風光獨占當送臘初歸迎春欲至芳姿偏婉孌料碎
翦就繒紈輝麗更把胭脂重染自賦得一般容冶宛勝
神仙妝臉 折近小閣幽牕酷愛處令親几硯孜孜觀

賞不枉人稱妙選待密密付如膏雨澤仍妝點任擾擾
百草千花掩迹一時羞見

寶鼎現

又一體三疊一
百五十八字

寶鼎現

張元幹

山莊圖畫錦囊吟詠胸中坵壑年少日如虹豪氣吐鳳
詞華渾忘却便袖手向巖前溪畔種蒲烟梢霧籜想別
墅平泉當時草木風流如昨 瘦藤閒倚看鋤藥雙芒

鞦雨後常著目送處飛鴻滅沒誰問蓬蒿爭燕雀乍霽
月望松雲南渡短艇敲沙夜泊正萬里青冥千林虛籟
從渠矰繳 攜幼尚有筠丁誰會得人生行樂岸幘綸
巾歸去深戶香迷翠幙恐未免上凌烟閣好在秋天鶚
念小山叢桂今宵狂客不勝杯勺

前調

又一體

劉辰翁

紅妝春騎踏月呼影千旗穿市望不盡瓊樓歌舞習習
香塵蓮步底簫聲斷約彩鸞歸去未怕金吾呵醉甚輦

路喧闐且止聽得念奴歌起
父老猶記宣和事抱銅
仙清淚如水還轉盼沙河多麗
滉瀟明光連邸第簾影
動散紅光成綺月浸蒲桃十里
看往來神仙才子肯把
菱花撲碎
腸斷竹馬兒童空見說三千樂指等多時
春不歸來到春時欲睡又說向燈前擁髻暗滴鮫珠墜
便當日親見霓裳天上人間夢裏

怨朱絃

雙調一百六十七字

明王世貞自度曲也

怨朱絃

王世貞

譜朱絃一片秋聲萬壑松濤銀漢初傾挾徧侯門沉深
似海雕闌十二嬌鶯流蘓帳底小按銀箏啞啞軋軋嚶
嚶罵書生煞橫捻冷裝酸攪破春情我道高山流水渠
道香雲暖雨兩語難憑怎能勾師涓老子證箇分明

酒人哉七首荊卿宋意悲歌高漸沾纓應徵飛霜倚天
雌霓長河倒瀉珠繩蒲萄尚暖蝴蝶猶縈陡被杜宇啼
醒道不如歸去歸去來兮任女縱橫魚為洞庭清樂鳳

為蘇門長嘯飛躍爭聽何須借天公兩耳枉施瑤京

三臺

又一體三疊一百七十一字

三臺

万俟雅言

見梨花初帶夜月海棠半含朝雨內苑春不禁過青門
御溝漲漲潛通南浦東風靜細柳垂金縷望鳳闕非煙非
霧好時代朝野多歡徧九陌太平簫鼓乍鶯兒百轉
斷續燕子飛來飛去近綠水臺榭映鞦韆鬪草聚雙雙

遊女餞香更酒冷踏青路曾暗識天桃朱戶向晚驟寶
馬雕鞍醉襟惹亂花飛絮正輕寒輕暖漏永半陰半
晴雲暮禁火天已是試新妝歲華到三分佳處清明看
漢蠟傳宮炬散翠煙飛入槐府斂兵衛闔闔門開任傳
宣又還休務

拋毬樂

又一體雙調一
百八十七字

拋毬樂

柳永

曉來天氣濃澹微雨輕灑近清明風絮巷陌烟草池塘
盡堪圖畫艷杏暖妝臉勻開弱柳困宮腰低亞是處麗
質盈盈巧笑嬉嬉爭簇鞦韆架戲綵球羅綬金雞芥羽
少年馳騁芳郊綠野占斷五陵遊秦脆管繁絃聲和雅
向名園深處爭泥畫輪競羈寶馬 取次羅列杯盤就
芳樹綠影紅陰下舞婆娑歌宛轉髣髴鶯嬌燕姁寸珠
片玉爭似濃歡無價任他美酒十千一斗飲竭仍解金
貂貫恣幕天席地陶陶盡醉太平且樂唐虞景化須信

艷陽天看未足已覺鶯花謝對綠蟻翠蛾怎生輕捨

哨徧

雙調一百九十九字哨或作稍本作哨徧般涉調
涉讀作瞻龜茲語五聲曰般瞻蓋此曲為羽音羽
於宮商歷第五故以徧名詞調取此按此調諸家
長短不同且用韻平仄互異今按字數分列各體
若句讀同而平仄
異者不復分體也

哨徧

樂禁王摩詰
與裴廸書

汪莘

近臘景和故山可過足下聽余述便自往山中憇精藍
與僧飯訖北涉灞川明月華映郭夜登華子岡頭立嗟

輞水淪漣與月上下寒山遠火朦朧聽林外犬類豹聲
雄更邨落誰家鳴夜舂疎鐘相間獨坐此時多思往日
噫記與君同清流仄徑玉琤琮攜手賦佳什往來蘿
月松風只待仲春天春山可望山中卉木垂蘿密見出
水輕儵點溪白鷺青皋零露方濕雉朝飛隴鳴儔匹念
去此非遙莫相失儻能從我敢相必天機非子清者此
事非所急是中有趣殊深願子無忽不能一一偶因默
藥附吾書是山人王維摩詰

哨徧

又一體雙調
二百一字

哨徧

為趙成父
賦魚計亭

辛棄疾

池上主人人適忘魚魚適還忘水洋洋乎翠藻青萍裏
相魚兮無便於此嘗試思莊周談兩事一明豕蚕一羊
蟻說蟻慕於羶於蟻棄知又說於羊棄意甚蟲焚於豕
獨忘之却驟說於魚為得計千古遺文我不知言以我
非子噫子固非魚魚之為計子焉知河水深且廣風

濤萬頃堪依有網罟如雲鵜鷁成陣過而留泣計應非
其外海茫茫下有龍伯饑時一啖千里更任公五十牯
為餌使海上人人厭腥味似鵠鵬變化幾東遊入海此
計直以命為嬉古來謬算狂圖五鼎烹死恒為平地嗟
魚欲事遠遊時請三思而行可矣

哨徧

又一體雙調
二百三字

哨徧

樂括歸
去來辭

蘇軾

為米折腰因酒棄家口體交相累歸去來誰不遣君歸
覺從前皆非今是露未晞征夫指予歸路門前笑語喧
童稚嗟舊菊都荒新松暗老吾年今已如此但小牕容
膝閉柴扉策杖看孤雲暮鴻飛雲出無心鳥倦知還本
非有意噫歸去來兮我今忘我兼忘世親戚無浪語
琴書中有真味步翠麓崎嶇泛溪窈窕涓涓暗谷流春
水觀草木欣榮幽人自感吾生行且休矣念寓形宇內
復幾時不自覺皇皇欲何之委吾心去留誰計神仙知

在何處富貴非吾願但知臨水登山嘯詠自引壺觴自
醉此生天命更何疑且乘流遇坎還止

前調

又一體
春詞

蘇軾

睡起畫堂銀蒜押簾珠幙雲垂地初雨歇洗出碧羅天
正溶溶養花天氣一霎時風迴芳草榮光浮動卷皺銀
塘水方杏靨勻酥花鬚吐繡園林翠紅排比見乳燕捎
蝶過繁枝忽一綫爐香惹遊絲晝永人閒獨立斜陽晚
來情味便乘興攜將佳麗深入芳菲裏撥胡琴語輕

攏慢撚總伶俐看緊約羅裙急趣檀板霓裳入破驚鴻
起顰月臨眉醉霞橫臉歌聲悠揚雲際任蒲頭紅雨落
花飛墜漸鴉鵲樓西玉蟾低尚徘徊未盡歡意君看今
古悠悠浮幻人間世這些百歲光陰幾日三萬六千而
已醉鄉路穩不妨行但人生要適情耳

前調

又一體

王安中

世有達人瀟灑出塵招隱青霄際終始追遊覽老山棲
藐千金輕脫如屣彼假容江皋濫巾雲岳櫻情好爵欺

松桂觀向釋談空尋真講道巢由何足相擬待詔書來
起便騶馳席次早焚裂芟荷衣敲扑喧喧牒訴忽忽抗
顏自喜嗟明月高霞石徑幽絕誰回睇空悵猿驚處
淒涼孤鶴嘹唳任列壑爭譏衆峰竦諄林慚澗媿移星
歲方浪杻神京騰裝魏闕徘徊經過留憇致草堂靈怒
蔣侯麾局岫幌驅烟勒新移忍丹崖碧嶺重滓鳴湍聲
斷幽谷逋客歸何計信知一逐浮榮便喪素守身成俗
士伯鸞家有孟光妻豈遂巡眷戀名利

前調

秋水觀

辛棄疾

蝸角鬪爭左觸右蠻一戰連千里君試思方寸此心微
總虛空并包無際喻此理何言泰山毫末從來天地一
稊米嗟小大相形鳩鵬自樂之二蟲又何知記跼行仁
義孔丘非更殤樂長年老彭悲火鼠論寒冰蠶語熟定
誰同異噫貴賤隨時連城纔換一羊皮誰與齊萬物
莊周吾夢見之正商略遺篇翩然顧笑空堂夢覺題秋
水有客問洪河百川灌雨涇流不辨涯涘於是焉河伯

欣然喜以天下之美盡在已渺滄溟望洋東視遂巡向
若驚歎謂我非逢子大方達觀之家未免長見悠然笑
耳此堂之水幾何其但清溪一曲而已

前調

用前韻

辛棄疾

一壑自專五柳笑人晚乃歸田里問誰知幾者動之微
望飛鴻冥冥天際論妙理濁醪正堪長醉從今自釀躬
耕米嗟美惡難齊盈虛如代天邪何必人知試回頭五
十九年非似夢裏歡娛覺來悲夔乃憐螭殼亦亡羊算

來何異 嘻物諱窮時豐狐文豹罪因皮富貴非吾願
遑遑乎欲何之正萬籟都沉月明中夜心彌萬里清如
水却自覺神遊歸來坐對依稀淮岸江溪看一時魚鳥
忘情喜會我已忘機更忘已又何曾物我相視非魚濠
上遺意要是我非子但教河伯休慙海若大小均為水
耳世間喜愠更何其笑先生三仕三已

前調

藥括盤
谷序

劉克莊

勝處可宮平處可田泉土尤甘美深復深路絕住人稀

有人兮盤旋於此送子歸是他隱居求志是要明主媒
當世嗟此意誰論其言甚壯孔顏猶有遺旨大丈夫之
被遇於時便入坐廟朝出旗麾列屋名姬夾道武夫滿
前才子噫有命存焉吾非惡此而逃之富貴人所欲
如之何幸而致向茂樹堪休清泉可濯谷中別有閒天
地愛鱸細於絲蕨甜似蜜采於山釣於水大丈夫不遇
之所為唐處士依稀是吾師覺山林尊如朝市五侯門
下賓客擾擾趨權勢嗟盤之樂誰爭子所占斷千秋萬

歲呼童秣馬更膏車便與君從此逝矣

前調

縣括蘭亭序

吳潛

晉在永和癸丑暮春初作蘭亭會集衆賢臨峻嶺崇山
有茂林脩竹流水暢幽情縱無管絃絲竹一觴一詠佳
天氣於宇宙之中游心騁目此娛信可樂只念人生相
與放形骸或一室晤言襟抱開靜躁雖殊當其可欣不
知老至游倦復何之情隨事改悲相係俛仰間遺迹
往往俱成陳矣約境遇變遷終期於盡修齡短景都能

幾漫古換今移時銷物化痛哉莫大生死每臨文弔往
一興嗟亦自悼不能喻於懷算彭殤妄虛均耳今之視
昔如契後視今猶昔故聊敘錄時人所述慨想世殊事
異後之覽者覽斯文將悠然有感於此

前調

問月

方岳

月亦老乎勸爾一杯聽說平生事吾問汝開闢自何時
有乾坤便應有爾年幾許鴻荒邈哉遐已吾今斷自唐
虞起繫帝曰放勳甲辰踐祚數至今宋嘉熙凡三千五

百廿年餘歎雨慙風僞幾盈虧老兔奔馳癡墓吞吐定
應哀矣 噫月豈無悲吾觀人壽幾期頤炯炯雙眸子
明清無過嬰兒但纔到中年昏然欲眊那堪老矣知何
似試以此推之吾言有理不能不自疑耳恐古時月與
今時異恨則恨今人不千歲但見今冰輪如洗阿誰曾
自前古看到隋唐世幾時明潔幾時昏暗畢竟少晴多
雨須臾月落夜何其曰先生寘之姑醉

前調

用前韻
作月對

方岳

月曰不然君亦怎知天上從前事吾語汝月豈有弦時
奈人間并觀乃爾休浪許歷家繆悠而已誰云魄死生
明起又明死魄生循環晦朔有老兔自熙熙妄相傳月
逝日光餘歎萬古誰知了無虧玉斧修成銀蟾奔去此
言荒矣噫世已堪悲聽君歌復解人頤桂魄何曾死
寒光不減些兒但與日相望對如兩鏡山河大地無疑
似待既望觀之冰輪漸側轉斜纔一鉤耳論本來不與
中秋異恐天問靈均未知此又底用咸池重洗乾坤一

點英氣寧老人間世飛上天來摩挲月去纔信有晴無
雨人生圓闕幾何其且徘徊與君同醉

前調

隳括赤壁賦

曹冠

壬戌孟秋蘇子夜遊赤壁舟輕漾觀水光瀾渺接遙天
月出於東山之上與客同清歡扣舷歌詠開懷飲酒情
酣暢如羽化登仙乘風獨立飄然遺世高尚客吹簫音
韻遠悠颺怨慕舞潛蛟動淒涼自古英雄孟德周郎舊
蹤可想噫水與月兮逝者如斯曷嘗往變化如一瞬

盈虛兮莫消長自不變而觀物我無盡何須感物興悲
悵夫天地之間物各有主惟同風月清賞念江山美景
豈可量吾與子樂之興相狎聽江渚樵歌漁唱侶魚鰕
友麋鹿舉匏尊相向人生堪笑蜉蝣一夢且縱扁舟放
浪戲將坡賦度新聲寫高懷自娛閒曠

戚氏

本曲名為詞調三
疊二百十二字

戚氏

柳永

晚秋天一霎微雨灑庭軒
檻菊蕭疎井梧零亂惹殘烟
淒然望鄉闕飛雲黯淡夕陽間
當時宋玉悲感向此臨
水與登山遠道迢遞行人淒楚
倦聽隴水潺湲正蟬吟
敗葉蛩響衰草相應聲喧
孤館度日如年風露漸變
悄悄至更闌長天靜絳河清淺
皓月嬋娟思絲絲夜永
對景那堪屈指暗想從前
未名未祿綺陌紅樓往往經
歲遷延
帝里風光好當年少日暮宴朝歡
況有狂朋
怪侶遇當歌對酒競留連
別來迅景如梭舊遊似夢煙

水程何限念利名憔悴長縈絆追往事空慘愁顏漏箭
移稍覺輕寒聽鳴咽畫角數聲殘對閒牕畔停燈向曉
抱影無眠

戚氏

又一體三疊
二百十四字

戚氏

蘇軾

玉龜山東皇靈姆統羣仙絳闕峩嶢翠房深迴倚霏煙
幽閒志蕭然金城千里鎖嬋娟當時穆滿巡狩翠華曾

到海西邊風露明
霽鯨波極目勢浮輿
蓋方圓正迢迢
麗日玄圃清寂瓊草芊緜
爭鮮繡勒香韉鑾輅駐蹕
八馬戲芝田瑤池近畫樓
隱隱翠鳥翩翩肆華筵花間
作管鳴絃宛若帝所鈞天
稚顏皓齒綠鬢方瞳圓極恬
澹高妍盡倒瓊壺酒獻金鼎
藥固大椿年縹緲飛瓊
妙舞命雙成奏曲醉留連雲
璈韻響瀉寒泉浩歌暢飲
斜月低河漢漸漸綺霞天際
紅深淺動歸思迴盼塵寰
爛漫遊玉輦東還杏花風數
里響鳴鞭望長安路依稀

柳色翠點春妍

鶯啼序

四疊二百三十四字此調字數最長
填詞多參錯不合今按字分別各體

鶯啼序

黃在軒

銀雲捲晴縹緲卧長龍一帶柳絲蘸幾簇柔煙雨市簾
棟如畫芳草岼灣環半玉鱗鱗曲港雙流會看碧天連
水翻成箭樣風快 白露橫江一葦萬頃問靈槎何在
空翠濕衣不勝寒日華金掌沆瀣斲花平綠紋襯步瓊

田湧出神仙界黛眉修依約霧鬟在秋波外 閣噓青

蜃檐啄彩虹飛蓋蹴黿背燈火暮相輪倒景偷睇別浦
片片歸帆舞蛟幽壑棲鴉古木有人翦取江水憶細鱗
巨口魚堪膾波涵笠澤時見靜影浮光霏陰萬貌千態
蒹葭深處應有閒鷗寄語休見猜洗却香紅塵面買
箇扁舟身世飄萍名利微芥欄干拍徧除東曹掾與天
隨子是我輩儘胸中著得乾坤大亭前無限驚濤總把
遙岑月明蒲載

前調又一

體

楊慎

碧鷄唱曉霞散綺重闕燈畫遶邨步幾簇生煙空翠幻
作仙界茭草蕩灣環洲渚輕風送幅蒲帆快看舞鷗飛
鷺聯翩向沈寥外晴兆須臾雨信頃刻問水椿山帶
樹羽颭風展青帘駁霞銷暝日曬浪花平洛神襯韞紅
妝湧出青羅蓋浮修眉約畧黛螺映盤鴉髻梅花汀
藻文石錦沙綸組迎船結漁火燄連漪倒影歸棹穿方
罨蒲牢昏吼棲鴉結陣八邨九寺鳴簫籟提筠籃金線

穿魚賣松燈點點互月彩卧玉塔浮瀾素娥窈窕千態
翠巖深靄禪室僧歸杖錫微徑隘月黑白林明處香
軟寒輕意以缸中梨夢紫唄南蠻老松遙看晴雪似銀
龍下斟玉瀝洗塵襟著得乾坤大輞川何似吾廬海變
春醪償風月債

鶯啼序

又一體四疊二
百三十六字

鶯啼序

重過
金陵

汪元量

金陵故都最好有朱樓迢遞歎倦客又此登高檻外已
少佳致更落盡梨花飛盡楊花春色成憔悴問青山三
國英雄六朝奇偉麥甸葵丘荒臺敗壘鹿豕銜枯薺
正潮打空城寂寞斜陽影裏聽樓頭哀笳怨角未把酒
愁心先醉漸夜深月滿秦淮烟籠寒水悽悽慘慘冷
清清燈火渡頭市慨商女不知興廢隔江猶唱庭花
餘音疊疊傷心千古淚痕如洗烏衣巷口青蕪路認依
稀王謝舊鄰里臨春結綺可憐紅粉成灰蕭索白楊風

起 因思疇昔鐵索千尋漫沉江底揮羽扇障西塵便
好角巾私第清談到底成何事回首新亭風景今如此
楚囚對泣何如已歎人間今古真兒戲東風歲歲還來
吹入鍾山幾重蒼翠

鶯啼序

又一體四疊二百四十字一名豐樂樓為此
調之正體同一字數體各不同俱為列出

鶯啼序

吳文英

天吳駕雲閭海凝春空燦綺倒銀海蘸影西城四碧天

鏡無際綵翼曳扶搖宛轉雩龍降尾交新霽近玉虛高
處天風笑語吹墜清濯緇塵快展曠眼傍危闌醉倚
面屏障一一鶯花薜蘿浮動金翠慣朝昏晴光雨色燕
泥動紅香流水步新梯藐視年華頓非塵世麟翁袞
烏領客登臨座有誦魚美翁笑起離席而語敢詫京兆
以後為功落成奇事明良慶會賡歌熙載隆都觀國多
閒暇遣丹青雅飾繁華地平瞻太極天街潤納璇題露
牀夜沉秋緯清風觀闕麗日杲恩正午長漏遲為洗

盡脂痕茸唾淨捲麴塵永晝低睡繡簾十二高軒馬
戎冠鳴珮班回花底修禊飲御爐香分惹朝衣袂碧桃
數點飛花湧出宮溝陽春萬里

前調

又一體

吳文英

殘寒正欺病酒掩沉香繡戶燕來晚飛入西城似說春
事遲暮畫船載清明過却晴烟冉冉吳宮樹念羈情遊
蕩隨風化為輕絮 十載西湖傍柳繫馬趁嬌塵暖霧
遡洄漸招入仙溪錦兒偷寄幽素倚銀屏春寬夢窄斷

紅濕歌紈金縷暝堤空輕把斜陽總還鷗鷺幽蘭漸
老杜若還生水鄉尚寄旅別後訪六橋無信事徃花委
瘞玉埋香幾番風雨長波妒盼遙山羞黛漁燈分影春
江宿記當時短楫桃根渡青樓髣髴臨分敗壁題詩痕
墨慘淡塵土危亭望極草色天涯歎鬢侵半苧暗點
檢離痕歡唾尚染鮫綃彈鳳迷歸破鸞慵舞殷勤待寫
書中長恨藍霞遼海沉過鴈漫相思彈入哀箏柱傷心
千里江南怨曲重招斷魂在否

前調

又一體
荷和韻

詠

吳文英

橫塘棹穿艷錦引鴛鴦弄水斷霞晚笑折花歸紺紗低
護燈蕊潤玉瘦冰輕倦浴斜拖鳳股盤雲墜聽銀牀聲
細梧桐漸覺涼思 牕隙流光過如迅羽慙空梁燕子
誤驚起風竹敲門故人還又不至記琅玕新詩細掐早
陳迹香痕纖指怕因循羅扇恩疎又生秋意 西湖舊
日畫舸頻移歎幾縈夢寐霞珮冷疊瀾不定麝靄飛雨
乍濕鮫綃暗盛紅淚練單夜共波心宿處瓊簫吹月霓

裳舞向明朝未覺花容悴
嬌香易落回頭澹碧銷烟鏡
空畫羅屏裏殘蟬度曲唱徹西園也
感紅怨翠念省慣吳宮幽憇
暗柳追涼曉岸參斜露零鷗起
絲縈寸藕留連歡事桃笙頻展
湘浪影有昭華濃李冰相倚如
今鬢點淒霜半篋秋詞恨盈蠹紙

前調


又一體
壽胡存齋

趙文

初荷一番濯雨錦雲紅
尚捲隘華屋賦客吟仙候望南
極天遠還報道飄然紫氣山
竒水勝都行徧却歸來領

客水晶庭院開宴 牕戶青紅正似京洛按笙歌一片
似別有金屋佳人桃根桃葉清婉倚薰風蚪鬚正綠人
似玉手接紈扇算風流只有蓬瀛畫圖曾見 誰知老
子正自蕭然於此興頗淺只擬問金砂玉蕊兔髓烏肝
偃月爐中七還九轉今來古往悠悠史傳神仙本是英
雄做笑英雄到此多留戀看看破曉耕龍跨海騎鯨千
年依舊丹臉 便教乞與萬里封侯奈朔風如箭又何
似六山一任種竹栽花棋局思量墨池揮染天還記得

生賢初念乾坤正要人撐拄便公能安隱天寧願待耆
佐漢功成伴赤松遊恁時未晚



御選歷代詩餘卷一百

欽定四庫全書

集部

御選歷代詩餘卷一百一
三

詳校官中書_臣潘有為

侍讀_臣孫球覆勘

總校官進士_臣朱鈐

校對官編修_臣沈清藻

謄錄監生_臣毛敬事

欽定四庫全書

御選歷代詩餘卷一百一

司經局洗馬掌局事兼翰林院修撰加二級臣王奕清奉

旨校刊

詞人姓氏

唐

昭宗諱傑懿宗第七子即位後改名敏

沈佺期字雲卿相州內黃人上元中舉進士長安中累

遷通事舍人除給事中考功郎坐贓配流嶺表神龍中授起居郎加修文館直學士侍宴為迴波詞悅帝因賜牙緋尋為太子詹事開元初卒善屬文尤長七言與宋之問齊名有集十卷

李景伯邢州柏仁人懷遠之子景龍中為諫議大夫景雲中進太子庶子終右散騎常侍

張說字道濟一字說之其先自范陽徙河南遂為洛陽人永昌中對策賢良方正第一授校書郎遷左補闕中

宗朝累遷至兵部侍郎兼修文館學士睿宗即位擢中書侍郎進同中書門下平章事監修國史開元初進中書令封燕國公出為幽州都督召拜兵部尚書同中書門下三品進尚書右丞相兼中書令遷左丞相授開府儀同三司卒謚文貞有集二十卷明皇使就家錄其文行於世

李白字太白涼武昭王九世孫其先隴西成紀人後徙居蜀天寶初游長安賀知章見其文言於明皇召見金

鑾殿奏頌一篇命供奉翰林懇求還山賜金放歸後坐
永王璘事流夜郎會赦還代宗立以左拾遺召已卒其
所製清平調菩薩蠻諸闕實詞調所自起云

王維字摩詰太原人開元九年進士第一調太樂丞擢
右拾遺歷監察御史累遷給事中肅宗立下遷太子中
允進中庶子終尚書右丞贈祕書監後代宗求其樂章
其弟縉集為十卷表上之

元結字次山灋州人天寶十二載進士蘇源明薦之肅

宗召見上時議三篇擢監察御史遷水部員外郎拜道
州刺史進客管經略使卒贈禮部侍郎自稱浪士更稱
鰲叟亦曰漫叟

張鶴齡一名松齡志和之兄官浦陽尉

張志和字子同金華人本名龜齡以明經擢第獻策於
肅宗得待詔翰林授左金吾衛錄事參軍改今名坐事
貶南海尉經量移不願之官扁舟江湖自稱煙波釣徒
憲宗嘗命物色之不能致著書十二卷名元真子亦以

自號

崔液字潤甫安喜人中書侍郎仁師之子官至殿中侍御史坐兄湜事廢

劉長卿字文房河間人開元中進士至德中為監察御史以檢校祠部員外郎為轉運使判官知淮西鄂岳轉運留後鄂岳觀察使吳仲儒誣奏貶潘州南巴尉尋除睦州司馬終隨州刺史有集十卷

韋應物京兆人周道遙公夏之後永泰中任洛陽丞歷

鄆櫟陽二縣令建中二年除比部員外郎出刺滁州改
江州入為左司郎中貞元初又刺蘇州有詩文集十卷
韓翃字君平南陽人天寶十三載進士侯希逸節度淄
青表佐幕府李勉任宣武復辟之建中初以駕部郎中
知制誥終中書舍人有集五卷

戴叔倫字幼公潤州金壇人師事蕭穎士貞元中及第
劉晏奏為主運湖南嗣曹王皋領湖南表在幕府楊惠
琳劫之不從建中中李希烈反留叔倫守撫州刺史封

金史卷一百一
譙縣男後遷客管經略德宗嘗賦中和節詩遣使寵餞
代還卒於道

張仲素字繪之元和中為翰林學士韋貫之謂學士所以備顧問不宜專取詞藝奏罷之

王建字仲初潁川人大厯十年進士官渭南尉歷祕書丞侍御史出為陝州司馬從軍塞上後歸卜居咸陽有
集十卷

劉禹錫字夢得中山人貞元中進士復登博學宏詞科

為監察御史與王叔文善擢屯田員外郎叔文敗貶朗
州司馬召還復出刺連州又歷夔和二州入為主客郎
中裴度薦為集賢直學士遷太子賓客會昌時加檢校
禮部尚書有集四十卷

柳宗元字子厚河東人貞元九年進士再登博學宏詞
科授校書郎歷藍田尉貞元十九年為監察御史裏行
王叔文用事擢禮部員外郎後坐叔文黨貶邵州刺史
再貶永州司馬元和十年徙為柳州刺史卒劉禹錫編

定其集凡四十五卷

白居易字樂天其先太原人徙下邳貞元中進士拔萃
補校書郎元和初入翰林為學士遷左拾遺進左贊善
大夫貶為江州司馬徙忠州刺史入為司門員外郎遷
主客郎中知制誥轉中書舍人出刺杭州分司東都復
刺蘇州文宗立以祕書監召遷刑部侍郎拜河南尹會
昌初以刑部尚書致仕贈尚書右僕射謚曰文自號醉
吟先生又號香山居士有長慶集七十五卷

李德裕字文饒贊皇人元和宰相吉甫之子以廕補校書郎累遷至翰林學士進中書舍人御史中丞出為浙西觀察使文宗立召拜兵部侍郎節度鄭滑徙劍南西川太和七年拜同中書門下平章事封贊皇縣伯武宗立再入相以平劉稹功拜太尉進封趙國公改衛國大中初貶崖州司戶卒懿宗朝追復故官贈尚書左僕射有會昌一品集二十卷姑臧集五卷行於世

杜牧字牧之京兆人貞元宰相佑之孫太和二年第進

士復舉賢良方正為淮南節度府掌書記擢監察御史
分司東都歷黃池睦三州刺史入為司勳員外郎復自
乞為湖州刺史踰年以考功郎中知制誥終中書舍人
有樊川集二十卷

溫庭筠本名岐字飛卿太原人貞觀宰相彥博之後累
舉不第大中末為方山尉徐商鎮襄陽署巡官及商執
政欲白用之會商罷遂廢唐自大中以後詩衰而倚聲
作至庭筠始有專集名握蘭金荃與詩集五卷漢南真

稿十卷並傳於世

段成式字柯古臨淄人長慶宰相文昌之子會昌時累擢尚書郎出為吉州刺史終太常少卿

皇甫松一作嵩字子奇睦州人工部郎中湜之子

崔懷寶

鄭符字夢復滎陽人官秘書監

張希復字善繼常山人牛僧孺之壻河南府士曹集賢校理後官學士有與段成式鄭符聯句

司空圖字表聖河中人咸通末進士由宣歙幕召為禮部員外郎遷郎中僖宗幸鳳翔間關至行在拜知制誥遷中書舍人後還河中屢徵不起昭宗在華召拜兵部侍郎復固辭隱居中條山之王官谷名其亭曰休休自稱耐辱居士朱全忠召為禮部尚書不食而卒有一鳴集三十卷

韓偓字致堯一字致光萬年人龍紀元年進士佐河中幕府召拜左拾遺累遷左諫議大夫王溥薦為翰林學

士遷中書舍人從昭宗幸鳳翔遷兵部侍郎進承旨欲
相者三四皆固辭後為朱全忠所惡貶濮州司馬天祐
二年復召為學士偓不敢入朝挈家南依王審知自號
玉山樵人所著有金鑾密記五卷詩一卷又香薷集一
卷

張曙小字阿灰成都人侍郎諱子龍紀元年進士

林楚翹

方外

呂巖字洞賓京兆人咸通中舉進士兩為縣令值黃巢亂攜家入終南山學道不知所終

宮嬪

楊太真小字玉環永樂人蜀州司戶參軍元琰之女始為壽王妃開元二十八年詔度為女道士賜號太真旋召入禁中稱娘子天寶初冊為貴妃

妓女

柳氏韓翃姬

劉米春浙人作囉噴曲元稹廡問浙東有因循歸未得
不是戀鱸魚之句或曰為好鑑湖春色耳謂米春也

女鬼

王麗真見才鬼錄

後唐

莊宗名存勗小字亞子天祐五年嗣立為晉王破燕滅
梁遂襲尊號改元同光在位三年性知音善度曲世傳
其一葉落宴桃源等詞

和凝字成績鄆州人舉進士仕後唐為翰林學士知制誥晉天福中拜中書侍郎同中書門下平章事後漢時加太子太傅封魯國公周顯德中卒贈侍中有集共百餘卷其長短句名紅葉稿

南唐

中主李璟字伯玉徐州人唐宗室之裔嗣父昇僭號江南改元保大初名景通後奉周正朔避廟諱改名璟降稱國主宋建隆二年卒其子從嘉乞追復帝號太祖許

之廟號元宗有長短句數首

後主李煜字重光初名從嘉璟之第六子建隆二年嗣立開寶八年國入於宋封違命侯太平興國中進封隴西郡公卒追封吳王贈太師煜妙於音律能自譜樂府後人合中主所作刺之為南唐二主詞集一卷

馮延巳一名延嗣字正中其先彭城人唐末徙家新安又徙廣陵事李昇為校書郎繼事璟累官翰林學士承旨進中書侍郎左僕射同平章事後改太子太傅所著

樂府甚多嘉祐中陳世修編定為陽春錄一卷

徐鉉字鼎臣會稽人父延休唐乾符中進士後仕吳遂家廣陵鉉與弟鍔俱知名時號二徐鉉始仕楊溥為祕書郎李昇時知制誥煜時累遷翰林學士歸宋為直學士院給事中散騎常侍淳化初坐累黜靜難軍司馬卒於邠有徐常侍集三十卷

張泌一作泌字子澄淮南人初官句容尉上書陳治道後主徵為監察御史歷考功員外郎進中書舍人改內

史舍人隨煜歸宋仍入史館遷郎中歸寓家思陵有集

一卷

盧絳字晉卿宜春人唐中書舍人肇之後舉進士不第
上書論事授沿江巡檢後主用為凌波都虞候累遷昭
武軍節度留後進柱國歸宋授冀州團練使

成幼文江南人官大理卿

耿玉真盧絳未遇時夢白衣女子歌菩薩蠻詞且曰他
日富貴相見於固子坡後絳入宋被刑有婦人耿玉真

者同新姿貌宛如所夢問其地為固子坡云

前蜀

後主王衍字化源許州人嗣父建僭號於蜀改元乾德
後唐同光四年舉國降天成中追封順正公衍有才思
尤好靡麗之詞所製詞曲蜀人皆傳誦焉

韋莊字端已杜陵人唐宰相見素之孫乾寧元年進士
官左補闕王建為西川節度使昭宗命莊同李詢宣諭
遂留掌書記尋以起居舍人召建復表留之及僭號進

莊左散騎常侍判中書門下事累官至吏部尚書同平章事卒謚文靖有集二十餘卷其弟藹編定其詩為浣花集五卷

牛嶠字松卿一字延峰隴西人唐宰相僧儒之後乾符五年進士歷官拾遺補尚書郎王建鎮蜀辟為判官後仕蜀為給事中有集三十卷

牛希濟嶠之兄子王衍時累官翰林學士御史中丞降於後唐明宗拜為雍州節度副使

庾傳素事王建為蜀州刺史累官至左僕射同平章事
罷為工部尚書衍嗣立加太子少保兼中書侍郎後降
唐授刺史

毛文錫字平珪南陽人唐太僕卿龜範子登進士仕蜀
為翰林學士遷內樞密使進文思殿大學士拜司徒貶
茂州司馬隨衍降唐復仕後唐與歐陽炯等並以詞章
供奉內庭所著有前蜀紀事二卷茶譜一卷

薛昭蘊官至侍郎

魏承班父弘夫為王建養子賜姓名王宗弼封齊王承班為駙馬都尉官至太尉

尹鶚成都人事王衍為翰林校書累官叅卿

李珣字德潤先世本波斯人家於梓州王衍昭儀李舜絃兄也為蜀秀才嘗與賓貢有瓊瑤集一卷

後蜀

後主孟昶字保元初名仁贊邢州人嗣父知祥僭號於蜀改元廣政宋乾德三年舉國降封秦國公卒贈尚書

令追封楚王謚恭孝性好學嘗集古今韻會五百卷亦
工樂府

歐陽彬字齊美衡州人前蜀時官翰林學士兵部侍郎
充唐國通好使後歸孟知祥歷事累官尚書左丞出
為寧江軍節度使

歐陽炯益州人事王衍為中書舍人後事知祥及累
官翰林學士進門下侍郎同平章事從累歸宋授左散
騎常侍

顧夔前蜀時官刺史後事知祥累遷至太尉

鹿虔扈事景為永泰軍節度使進檢校太尉加太保

閻選蜀布衣時稱為閻處士

毛熙震蜀人官秘書監

徐氏青城人有才色景冊為貴妃升號慧妃別稱花蕊
夫人嘗倣王建作宮詞百首為時所稱

南漢

黃損字益之連州人登梁龍德二年進士第後仕南漢

劉龔居幕府累進尚書左僕射以極諫忤意退居永州卒或曰仙去所著有三要書桂香集射法

楚

伊用昌南岳道士有異術

南平

孫光憲字孟文貴平人唐時為陵州判官天成初避地江陵高季興據荆南署為從事歷事三世累官荆南節度副使檢校祕書兼御史中丞後勸高繼冲歸宋太祖

授以黃州刺史將用為學士未及而卒自號葆光子有
荆臺筆傭橘齋輦湖諸集

徐昌圖莆陽人與兄昌嗣並有才名陳洪進歸宋令昌
圖奉表入汴太祖命為國子博士累遷殿中丞

閩

陳金鳳福清人唐福建觀察使陳巖女王審知選為才
人延鈞立復嬖之封淑妃及僭號冊為后金鳳善歌舞
嘗作樂游曲

御選歷代詩餘卷一百一

欽定四庫全書

御選歷代詩餘卷一百二

司經局洗馬掌局事兼翰林院修撰加二級臣王奕清奉

旨校刊

詞人姓氏

宋

徽宗諱佖神宗子天才睿敏詩文之外尤工長短句書畫入妙世稱宣和名筆

高宗諱構字德基徽宗第九子博學強記政事之暇寄情歌咏所製漁父詞尤為世所傳

潘閔字逍遙大名人嘗居洛陽賣藥太宗朝有薦其能詩者召見崇政殿賜進士及第授四門國子博士後坐事遁入中條山中題詩鐘樓寺僧疑而迹之復逸去尋出自首謫信州真宗朝為滁州參軍有逍遙詞一卷

蘇易簡字太簡梓州人太平興國五年登進士覆試擢甲科第一由知制誥入為翰林學士續唐李肇翰林志

二卷以獻太宗賜詩嘉之淳化中參知政事後以禮部侍郎出知鄧州

寇準字平仲下邳人年十九登太平興國中進士除巴東令累官尚書右僕射集賢殿大學士景德中同中書門下平章事封萊國公為丁謂所構貶雷州司戶參軍仁宗朝贈中書令謚忠愍有巴東集

王禹偁字元之鉅野人太平興國八年進士端拱初召試擢右拾遺直史館二年拜左司諫知制誥坐事貶旋

召為禮部員外郎歷翰林學士又罷為工部郎中知滁州改知揚州復召還知制誥再出知黃州徙鄭州有小畜集

丁謂字公言初字謂之長洲人淳化三年進士天禧初拜平章事封晉國公後貶崖州

夏竦字子喬德安人舉賢良方正慶歷中同中書門下平章事判大名府召入為宰相改樞密使封英國公進封鄭國公卒贈太師中書令謚文正以劉敞言改謚文

莊有集一百卷

錢惟演字希聖吳越王俶之子少補牙門將歸宋為右屯衛將軍召試學士院改太僕少卿累遷至樞密使罷為鎮國軍節度觀察留後改保大軍節度知河陽入朝加同中書門下平章事坐擅議宗廟又與后家通婚落平章事以崇信軍節度使歸鎮卒贈侍中謚曰思改謚文僖有擁旌集

趙抃字閱道西安人第進士為武安推官歷知崇安海

陵江源三縣通判泗州以曾公亮薦擢殿中侍御史英
宗朝除龍圖閣直學士知成都神宗初召知諫院擢叅
知政事與王安石議政不協求去除資政殿學士出知
越州尋以太子少保致仕卒贈太子少師謚清獻

晏殊字同叔臨川人景德初張知白安撫江南以神童
薦真宗召見命與進士並試援筆立成賜同進士出身
累官翰林學士左庶子仁宗朝遷右諫議大夫兼侍讀
學士歷遷至叅知政事集賢殿學士拜同中書門下平

章事兼樞密使卒贈司空兼侍中謚元獻有珠玉詞一卷

陳堯佐字希元閬中人少師省華次子少從种放讀書終南山第進士歷官同中書門下平章事集賢殿大學士以太子太師致仕贈司空兼侍中謚文惠

賈昌朝字子明獲鹿人天禧中真宗祈穀南郊昌朝獻頌召試賜進士出身除晉陵簿景祐初授崇政殿說書歷天章閣待制累官至同中書門下平章事兼侍中封

許國公英宗立加左僕射進封魏國公謚文元有集百
十二卷木蘭花令一調極為黃昇所稱

王益臨川人安石之父官都官員外郎

杜衍字世昌山陰人登進士甲科歷官州縣皆有政績
慶厯中拜同平章事集賢殿大學士兼樞密使以事罷
知兗州致仕皇祐中進太師封祁國公卒贈司徒兼侍
中謚正獻

王琪字君玉華陽人舉進士調主簿除館閣校勘集賢

校理歷官知制誥加樞密直學士以禮部侍郎致仕所
製樂府名謫仙長短句

林逋字君復錢塘人少孤力學不事進取放遊江淮間
久之歸杭州結廬西湖之孤山二十年足不及城市真
宗賜以粟帛詔有司歲時勞問及卒仁宗賜謚和靖先
生有和靖先生集附詞

李遵勗字公武上黨人崇矩之孫登進士大中祥符間
召見便殿尚荆國大長公主授左龍武軍駙馬都尉賜

第永寧里累遷寧國軍節度使徙鎮國軍知許州卒贈
中書令謚和文有間宴集

葉清臣字道卿長洲人天聖二年舉進士對策擢第二
歷官翰林學士權三司使罷為侍讀學士知河陽卒贈
左諫議大夫有集

聶冠卿字長孺新安人舉進士授連州軍事推官以大
臣薦召試學士院充館閣校勘預撰景祐廣樂記慶歷
中入為翰林學士判昭文館兼侍讀學士有蘄春集

韓琦字稚圭安陽人天聖五年進士第二人嘉祐初歷
官同中書門下平章事集賢殿大學士遷昭文館大學
士進右僕射再進司空兼侍中封儀國公進封衛國公
再進封魏國公卒贈尚書令謚忠獻徽宗追論定策功
贈魏郡王有安陽集

范仲淹字希文吳縣人大中祥符八年進士明道中為
右司諫以直言遠貶尋召還累官至權知開封府復忤
呂夷簡貶知饒州西北用兵仁宗以仲淹人望所屬起

為陝西招討副使兼知延州改知慶州屢進樞密直學士右諫議大夫充陝西路安撫招討使召還拜樞密副使除叅知政事卒贈兵部尚書楚國公諡文正有集

李師中字誠之楚丘人登進士仁宗朝權主管經畧司文字提點廣西路刑獄歷天章閣待制河東都轉運使貶和州團練副使安置稍遷至右司郎中

宋祁字子京安陸人徙居雍丘天聖中與兄郊同舉進士時稱為大小宋累官翰林學士承旨知制誥卒贈尚

書謚景文有出麾小集西州猥稿

吳感字應之天聖二年省試第一又中拔萃科仕至殿中丞以詠紅梅詞得名

韓維字持國雍丘人忠獻公億之子用門廕入仕歐陽修薦為檢討知太常禮院出判涇州除同修起居注進知制誥神宗初除龍圖閣直學士歷知州郡召拜門下侍郎以太子少傅致仕

韓縝字玉汝維之弟登進士累官大中大夫同知樞密

院事拜尚書右僕射兼中書侍郎以太子太保致仕贈
司空崇國公謚莊敏

鄭獬字毅夫安陸人皇祐五年舉進士第一知制誥神
宗召對內東門命草制賜雙蓮燭送歸院拜翰林學
士命權知開封府王安石惡之以侍讀學士出知杭州
徙青州有鄖溪集

張昇字杲卿韓城人大中祥符八年進士累官叅知政
事兼樞密使以彰信軍節度使同中書門下平章事判

許州改鎮河陽進太子太師致仕卒贈司徒兼侍中謚
康節

謝絳字希深富陽人以父濤廕試秘書省校書郎復登
進士甲科知汝陰縣遷光祿寺丞召試擢祕閣校理歷
官至朝散大夫行尚書兵部員外郎知制誥出知鄧州
歐陽修字永叔廬陵人兩試國子監一試禮部皆第一
擢進士甲科補西京留守推官景祐初召試遷館閣校
勘歷官至禮部侍郎兼翰林侍讀學士進樞密副使叅

知政事熙寧四年以觀文殿學士太子少師致仕卒贈
太子太師謚文忠修初號醉翁晚更號六一居士有六
一居士詞三卷

蘇舜欽字子美易簡之孫以父廕補太廟齋郎調滎陽
尉復舉進士官大理評事范仲淹薦其才召試擢集賢
校理監進奏院為王拱辰誣奏除名寓居吳中買水石
一區作滄浪亭以詩酒自放後為湖州長史卒有集

梅堯臣字聖俞宣城人以從父詢廕為河南主簿歷鎮

安判官仁宗召試賜進士出身為國子監直講遷尚書
屯田都官員外郎有宛陵集

石延年字曼卿其先幽州人徙宋城累舉進士不第補
三班奉職遷殿直累遷大理寺丞通判海州終太子中
允祕閣校理

司馬光字君實夏縣人寶元初登進士甲科累官天章
閣待制知諫院治平間為諫議大夫龍圖閣直學士熙
寧初遷翰林學士御史中丞進樞密副使不拜與王安

石不合出知永興軍哲宗立拜門下侍郎進尚書左僕射卒贈太師溫國公謚文正

王安石字介甫臨川人慶厯中擢進士第知鄞縣嘉祐三年為度支判官遷直集賢院同修起居注知制誥神宗在潁邸聞其名及即位命知江寧府數月召為翰林學士兼侍講熙寧二年拜叅知政事三年拜同平章事七年罷八年復相屢謝病出判江寧府元豐二年復拜左僕射封舒國公改封荆卒贈太師謚曰文追封舒王

晚居金陵自號半山老人有臨川集詞一卷

范純仁字堯夫仲淹次子第進士除官不赴仲淹沒始
出仕治平中為侍御史爭濮王典禮出判安州神宗朝
知諫院加直集賢院同修起居注忤王安石改判國子
監出知河中府哲宗立命同知樞密院事元祐三年拜
尚書右僕射兼中書侍郎紹聖中貶永州安置後追贈
開府儀同三司許國公謚忠宣有集

晏幾道字叔原殊之幼子嘗監潁昌許田鎮有小山詞

一卷黃庭堅為之序

張先字子野吳興人晏殊尹京兆辟為通判歷官都官郎中居錢塘嘗創花月亭有子野詞一卷

柳永字耆卿初名三變樂安人景祐元年進士歷官屯田員外郎有樂章集九卷

韋驤字子駿錢塘人皇祐五年進士歷官尚書主客郎中提點夔州路刑獄有集

選歷代詩餘卷一百二

欽定四庫全書

御選歷代詩餘卷一百三

司經局洗馬掌局事兼翰林院修撰_臣王奕清奉

旨校刊

詞人姓氏

宋

蘇軾字子瞻一字和仲自號東坡居士睢山人嘉祐二年試禮部第一復對制策入三等歷官端明殿學士兼

翰林侍讀學士守禮部尚書紹聖初安置惠州徙昌化
元符初北還高宗即位贈資政殿學士再贈太師諡文
忠有東坡居士詞二卷

蘇轍字子由年十九與兄軾同登進士科又同策制舉
以直言置下等授商州軍事推官神宗立上書召對為
三司條例屬官以忤王安石徙他職後坐兄軾詩禍謫
監筠州鹽酒稅移知績溪縣哲宗即位召入元祐初為
右司諫遷起居郎中書舍人代軾為翰林學士尋權吏

部尚書使契丹還為御史中丞尋拜尚書右丞進門下
侍郎以直諫落職知汝州再謫袁州未至降秩試少府
監分司南京筠州居住又謫化州別駕雷州安置移循
州徽宗朝徙永州岳州已而復大中大夫奉祠蔡京當
國又降居許州致仕自號潁濱遺老卒追復端明殿學
士淳熙中謚文定有樂城集

曾鞏字子固南豐人登嘉祐二年進士第歷集賢校理
出通判越州知齊襄洪三州加直龍圖閣知福州屢外

徙尋判三班院加史館修撰終中書舍人有南豐集

黃度堅字魯直分寧人自號山谷道人一號涪翁舉進士元祐初為校書郎遷集賢校理擢起居舍人除祕書丞以忤章惇蔡卞貶涪州別駕安置黔州起監鄂州稅遷知舒州復貶宜州卒追謚文節有山谷詞二卷

黃知命字元明度堅之弟

秦觀字少游初字太虛高郵人登第後蘇軾薦於朝除太學博士遷祕書省正字兼國史院編修官坐黨籍遠

徙徽宗朝放還有淮海詞三卷

晁補之字无咎鉅野人元祐初應進士舉試開封府及
禮部別試皆第一除祕書省正字遷校書郎以祕閣校
理通判揚州尋召還為著作郎坐黨籍徙放還後葺歸
來園自號歸來子又稱濟北詩人大觀末起知泗州有
雞肋集詞一卷其琴趣外篇六卷則俗人贗托者

張耒字文潛淮陰人第進士歷官起居舍人以直龍圖
閣知潤州坐黨籍謫官晚監南嶽廟主管崇福宮建炎

初贈集英殿修撰有宥丘集嘗從蘇軾游與黃庭堅秦觀晁補之稱蘇門四學士

陳師道字履常一字無已號後山彭城人年十六謁曾鞏鞏大器之元豐初曾鞏典五朝史事以白衣薦為史館屬章惇屢招之卒不一往元祐初蘇軾薦為徐州教授未幾除太學博士坐黨籍罷官元符間除祕書省正字有後山集長短句二卷

李廌字方叔華山人嘗携所作文謁蘇軾於杭州軾大

稱賞復歸華山閉戶讀書應鄉舉試禮部不第遂絕意
進取定居長社有濟南集又名月巖集

李之儀字端叔無棣人第進士歷樞密院編修官通判
原州徽宗初提舉河東常平坐為范純仁作遺表及行
狀編管太平自號姑溪居士久之徙唐州終朝請大夫
有姑溪詞二卷

賀鑄字方回衛州人孝惠后族孫嘗為武弁元祐中通
判泗州又倅太平州退居吳下築室於橫塘自號慶湖

遺老自哀其歌詞為東山寓聲樂府三卷

毛滂字澤民江山人為杭州法曹以樂府受知蘇軾得名嘗知武康縣又知秀州有東堂樂府二卷行於世
王仲字與善元祐間人

杜安世字壽域有詞一卷

李元膺南京教官

孫洙字巨源廣陵人未冠登進士補秀州法曹復舉制科遷集賢校理太常禮官治平中兼史館檢討同知諫

院出知海州元豐初召還直學士院撰靈津廟碑稱旨
擢翰林學士有孫賢良集

朱服字行中烏程人熙寧中登進士甲科累官國子司
業起居舍人以直龍圖閣知潤州徙泉婺寧廬壽五州
紹聖初名為中書舍人歷禮部侍郎坐與蘇軾遊貶海
州團練副使蘄州安置

章綵字質夫浦城人以叔得象廕為孟州司戶參軍試
禮部第一歷官樞密直學士龍圖閣端明殿二學士以

平夏州功拜同知樞密院事贈右銀青光祿大夫謚莊
簡揮塵錄作莊敏

舒亶字信道慈谿人試禮部第一累官御史中丞以罪
斥終龍圖閣待制贈直學士

李清臣字邦直魏人舉進士歷官知制誥翰林學士遷
尚書左丞罷為資政殿學士復拜中書侍郎以大學士
知河南府徽宗立入為門下侍郎出知大名府贈金紫
光祿大夫

王誨字晉卿太原人徙開封尚英宗女魏國大長公主
歷官定州觀察使開國公駙馬都尉贈昭化軍節度使
諡榮安

趙令時字德麟燕懿王德昭之後元祐中簽書潁州公
事蘇軾為守愛其才薦於朝及軾被竄坐交通罰金後
官右朝請大夫改右監門衛大將軍營州防禦使遷洪
州觀察使襲封安定郡王尋遷寧遠軍承宣使同知行
在大宗正事贈開府儀同三司有聊復集一卷

王安禮字和甫臨川人安石之弟登制科呂公弼薦為著作佐郎崇文院校書厯遷直舍人院同修起居注進知制誥翰林學士尚書左丞元祐中加資政殿學士厯揚青蔡三州刺史

王安國字平甫臨川人安禮之弟熙寧初用韓絳薦召試賜進士及第又舉茂才異等除西京國子教授崇文院校書改祕閣校理坐鄭俠事奪官有王校理集

曾肇字子開南豐人肇之弟舉進士元祐中官中書舍

人徽宗朝再入西掖遷翰林學士兼侍讀以龍圖閣學士提舉中太乙宮崇寧中安置汀州紹興初追諡文昭有曲阜集

晁冲之字叔用一字用道鉅野人舉進士紹聖初以黨論被逐隱居具茨山下號具茨先生有具茨集詞一卷秦觀字少章高郵人觀之弟舉進士

王觀字通叟如皋人試開封府第一中元祐二年進士第官翰林學士以賦應制詞被謫因自號逐客有冠柳

集一卷一云官大理寺丞知江都縣事

孔武仲字常父臨江新喻人至聖四十八代孫也舉進士中甲科調穀城主簿教授齊州為國子直講歷祕書正字校書集賢校理著作郎國子司業論詆王氏進起居郎侍講邇英起居舍人旋拜中書直學士院擢給事中遷禮部侍郎以寶文閣待制知洪州改宣州坐元祐黨奪職居池州卒與兄文仲弟平仲並有文名時稱二蘇三孔有清江集

孔平仲字毅父武仲之弟第進士呂公著薦為祕書丞
集賢校理出為江東轉運判官紹聖中坐元祐黨謫知
衡州徙韶州復謫惠州別駕安置徽宗立召為戶部金
部郎中出提舉永興路刑獄帥鄜延環慶黨論再起罷
職有清江集

米芾字元章太原人徙居襄陽又徙居吳以恩補臨光
尉歷官太常博士知無為軍召為書畫學博士擢禮部
員外郎出知淮陽軍有襄陽集

滕宗諒字子京河南人舉進士范仲淹薦其才以秦州軍事推官召試學士院改大理寺丞累遷至天章閣待制出知慶州再知虢州復徙岳州終知蘇州

鄭僅字彥能彭城人第進士歷官顯謨閣待制出知寧州徙秦州遷都轉運使召拜戶部侍郎改吏部侍郎知徐州終顯謨閣直學士通議大夫贈光祿大夫謚修敏黃裳字勉仲延平人元豐五年進士先是神宗見裳所著文喜之及進讀試策親擢為第一累官端明殿學士

贈少傅有演山集詞二卷

張景修字景叔常州人治平中舉進士元豐末為饒州浮梁令遷郎中

孫樣字濟師

程過字觀過

解昉字方叔

陳亞字亞之揚州人咸平五年舉進士嘗知潤州終司封郎中一云太常少卿有澄源集

張舜民字芸叟邠州人登進士第以薦為監察御史累
官至吏部侍郎坐元祐黨謫楚州復為集賢殿修撰自
號浮休居士有畫墁集

沈括字存中錢塘人以父任為沭陽主簿登進士第編
校昭文書籍為館閣校勘遷太子中允檢正中書刑房
提舉司天監歷遷太常丞同修起居注擢知制誥兼通
進銀臺司自中允至是纔三月為河北西路察訪使遣
聘契丹還拜翰林學士權三司使為蔡確所論以集賢

學士知宣州明年復龍圖閣待制知審官院又出知青州未行改延州以副种諤西討巴延有功加龍圖閣學士坐失援謫均州團練副使元祐初徙秀州繼以光祿少卿分司居潤卒括博學無所不通多所論著又有夢溪筆談

王雱字元澤安石之子舉進士調旌德尉累官崇政殿說書遷天章閣待制兼侍講進龍圖閣直學士贈右諫議大夫

蔡挺字子政一作子正宋城人第進士累官天章閣待
制出知渭州進右諫議大夫龍圖閣直學士拜樞密副
使贈工部尚書謚肅敏

汪輔之字正夫宣州人熙寧中登第歷官職方郎中廣
南轉運使左遷知虔州有集三十卷

蘇庠字養直丹陽人紹聖中與徐俯同名不起自放江
湖間號後湖居士有後湖集一卷

劉涇字巨濟簡州人舉進士王安石薦其才召見除經

義所檢討遷太學博士後官至職方郎中有前溪集五
卷

潘元質金華人

蘇過字叔黨軾之第三子當時號為小坡初監太原府
稅次知潁昌府郾城縣皆坐黨人子弟去官終於通判
中山府留家潁昌經營湖陰水竹數畝名曰小斜川自
號斜川居士有斜川集

秦湛字處度觀之子官宣教郎

李嬰

許庭字伯揚濠梁人

葛勝仲字魯卿丹陽人紹聖四年進士歷官禮部員外郎權國子司業遷太常卿兼諭德除國子祭酒出知汝州改湖州謚文康有丹陽集詞一卷

李冠字世英山東人

張表臣官承議郎通判常州著珊瑚鉤詩話

查堇

周紫芝字少隱宣城人兩以鄉貢試禮部不第從李之儀呂本中遊年六十一始以廷對第三同學究出身歷樞密院編修官右司員外郎出知興國軍秩滿奉祠居廬山有竹坡詞一卷

謝逸字無逸臨川人第進士有溪堂詞一卷

謝邁字幼槃逸之從弟有竹友詞一卷

葛郊字謙問丹陽人有信齋詞一卷

趙鼎臣字承之衛城人登元祐甲科紹聖間舉博學宏

詞科宣和中以右文殿修撰知鄧州召為太府卿自號
葦溪翁有竹隱畸士集

廖行之字天民衡陽人有省齋詩餘一卷

周邦彥字美成錢塘人元豐初進汴都賦神宗異之除
太學正歷官祕書監進徽猷閣待制提舉大晟府出知
順昌府徙知處州秩滿以待制提舉南京鴻慶宮有清
真集二卷後集一卷

晁端禮字次膺熙寧六年進士兩為縣令政和癸巳以

蔡京薦赴闕進詞稱旨除大晟府協律郎有閒適集一卷

孔方平

田不伐

曹組字元寵潁昌人宣和三年登進士第有旨換武階兼閣職仍給事殿中揮麈錄云官副使有箕頴集

万俟雅言自號詞隱遊上庠不第崇寧中充大晟府製撰有大聲集五卷

徐伸字幹臣三衢人政和初以知音律為太常典樂出知常州有青山樂府一卷

陳克字子高臨海人僑寓金陵元豐間呂安老辟入幕府為參議官有赤城詞一卷

李祁字蕭遠官至尚書郎宣和間責監漢陽酒稅

呂渭老字聖求秀州人宣和末朝士有詞一卷趙師秀序之

趙企字循道南陵人神宗朝舉進士大觀中宰績溪縣

歷員外郎

李持正字季秉政和五年進士歷知德慶南劍潮陽三郡終朝請大夫

王寀字道輔一云字輔道江州人樞密韶之子登第後為校書郎宣和末官至侍郎以林靈素譖坐法

韓駒字子蒼蜀利州仙井監人政和初以獻頌補假將仕郎召試賜進士除祕書省正字坐蘇氏黨謫知分寧召為著作郎遷中書舍人兼修國史權直學士院尋提

舉太平觀出知江州卒贈中奉大夫有陵陽集

徐積字仲車楚州山陽人中進士第除揚州司戶參軍
楚州教授改和州防禦推官徽宗立改宣德郎賜諡節
孝處士有集二十卷

何籀字子初信安人

蔣子雲字元龍

宋齊愈字退翁宣和三年上舍第一建炎初官諫議大
夫

李甲字景元華亭人

夏倪字均父蘄州人疎之諸孫自府曹左官監祁陽酒稅終知江州有遠遊集

沈會宗字文伯

孫浩然

廖世美

林少瞻

何大圭字摺之廣德軍人年十八試禮部第一徽宗朝

舉進士

沈公述

魯逸仲

何鼎字子縝一云字文縝蜀利州仙井監人政和丙申
進士第一歷官御史中丞尚書右僕射兼中書侍郎贈
觀文殿大學士

陳瓘字瑩中延平人中甲科建中靖國初為右司諫極
論章惇蔡卞之奸章疏十上遂除名編隸合浦靖康中

贈諫議大夫紹興中追謚忠肅有了齋集詞一卷

王安中字履道曲陽人進士及第宣和中累官御史中丞翰林學士承旨尚書左丞燕雲既復授慶遠軍節度使河北河南燕山府路宣撫使加少師靖康初安置象州紹興初復左中大夫有初寮集詞一卷

楊适字時可棣州人年十八登進士第晚始出仕為尚書比部員外郎

劉燾字無言元祐中進士有見南山集

方喬樂至人大觀間秀才

李玉

波子山宿州獄掾

蔡伸字伸道莆田人襄之孫宣和中官彭城倅歷左中大夫自號友古居士有友古詞一卷

王之道字彥猷濡須人宣和六年與兄之義之深同舉進士歷官樞密使封魏國公有相山居士詞二卷

向鎬字豐之河內人有樂齋詞二卷


劉弁字偉明廬陵人登元豐進士第繼中博學宏詞科
元符中進南郊大禮賦稱旨除秘書省正字改著作佐
郎實錄檢討官有龍雲集三十二卷

趙師俠字介之燕王德昭七世孫舉進士有坦菴長短
句一卷

趙長卿南豐宗室自號仙源居士有惜香樂府十卷
王灼字晦叔遂寧人有願堂詞一卷

陳濟翁

汪存字公澤婺源人元豐七年領鄉薦元祐中授西京
文學上封事不報棄官歸養政和間復故官力辭乞歸
學者稱四友先生



御選歷代詩餘卷一百三